



'Rakyat sejahtera, kos sara hidup lestari'

Oleh Mohamed Farid Noh - Disember 3, 2022 @ 2:37pm

JOHOR BAHRU: Naib Pengerusi Pakatan Harapan (PH), Datuk Seri Salahuddin Ayub, berikrar akan memelihara kesejahteraan segenap lapisan rakyat selaku Menteri Perdagangan Dalam Negeri dan Kos Sara Hidup.

Timbalan Presiden Parti Amanah Negara (AMANAH) yang juga Pengerusi PH Johor itu juga akan memastikan kehidupan rakyat terjamin dengan kos sara hidup yang lebih lestari.

"Terima kasih kepada Perdana Menteri, Datuk Seri Anwar Ibrahim, atas kepercayaan dan peluang untuk saya menabur bakti dalam Kabinet.

"Saya sedia menggalas amanah yang diberikan untuk memastikan kesejahteraan rakyat terjamin dengan kos sara hidup yang lebih lestari," katanya dalam kenyataan di akaun Facebook, hari ini.

Salahuddin pernah dilantik Menteri Pertanian dan Industri Asas Tani pada 2018 sehingga Februari 2020.

Beliau berkata, lebih banyak usaha sama diperlukan dalam Kerajaan Perpaduan bagi mendukung aspirasi rakyat, sekali gus memacu ekonomi Malaysia yang lebih mampan.

"Terima kasih sekali lagi buat rakyat Malaysia yang mengundi pada Pilihan Raya Umum ke-15 (PRU15) baru-baru ini.

"Teruskan doa dan sokongan anda kepada kami," katanya yang juga Ahli Dewan Undangan Negeri (ADUN) Simpang Jeram.